

BOSNA I HERCEGOVINA

Brčko distrikt BiH

**SKUPŠTINA**

**BRČKO DISTRIKTA BiH**



БОСНА И ХЕРЦЕГОВИНА

Брчко дистрикт БиХ

**СКУПШТИНА**

**БРЧКО ДИСТРИКТА БиХ**

*Mladena Maglova 2, 76100 Brčko distrikt BiH, telefon i faks: 049/215-516*

*Младена Маглова 2, 76100 Брчко дистрикт БиХ, тел. и факс: 049/215-516*

Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 3. redovnoj sjednici održanoj 24. februara 2021. godine, usvaja

## **ZAKON O ZAŠTITI PRAVA NA SUĐENJE U RAZUMNOM ROKU**

### **DIO PRVI – OPŠTE ODREDBE**

#### **Član 1 (Predmet zakona)**

Ovim zakonom propisuju se način, uslovi i postupak zaštite prava na suđenje u razumnom roku u sudskim postupcima koji se vode pred nadležnim sudom u Brčko distriktu Bosne i Hercegovine (u daljnjem tekstu: sud).

#### **Član 2 (Svrha zakona)**

Svrha ovog zakona jeste da spriječi nastajanje povrede prava na suđenje u razumnom roku i pruži sudsku zaštitu u slučaju povrede tog prava.

#### **Član 3 (Rodna ravnopravnost i diskriminacija)**

Pravo na zaštitu prava na suđenje u razumnom roku pod uslovima propisanim ovim zakonom imaju sve osobe bez diskriminacije po bilo kom osnovu u skladu sa Statutom Brčko distrikta Bosne i Hercegovine i propisima koji uređuju zabranu diskriminacije.

#### **Član 4 (Imaoci prava na suđenje u razumnom roku)**

(1) Stranka u sudskom postupku koja smatra da nadležni sud nije odlučio u razumnom roku o njenom pravu, obavezi ili optužbi za krivično djelo, ima pravo na zaštitu svojih prava i korištenje pravnih sredstava shodno odredbama ovog zakona.

(2) U postupku za zaštitu prava na suđenje u razumnom roku, stranka je oslobođena plaćanja sudskih taksi.

(3) Organima uprave i drugim nosiocima javnih ovlaštenja ne pripadaju prava iz ovog zakona.

## Član 5

(Pravna sredstva kojima se štiti pravo na suđenje u razumnom roku)

(1) Pravna sredstva kojima se štiti pravo na suđenje u razumnom roku jesu:

a) zahtjev za zaštitu prava na suđenje u razumnom roku (u daljnjem tekstu: zahtjev) i

b) zahtjev za isplatu novčane naknade zbog povrede prava na suđenje u razumnom roku.

(2) Postupak odlučivanja o zahtjevima iz stava 1 ovog člana provodi se uz odgovarajuću primjenu pravila o vanparničnom postupku bez održavanja ročišta.

## Član 6

(Mjerila za ocjenu trajanja suđenja u razumnom roku)

Pri odlučivanju o pravnim sredstvima kojima se štiti pravo na suđenje u razumnom roku garantovano članom II.3 e) Ustava Bosne i Hercegovine i članom 6 stava 1 Evropske konvencije za zaštitu ljudskih prava i osnovnih sloboda, uvažavajući standarde prava na pravično suđenje koje je utvrdio Evropski sud za ljudska prava i Ustavni sud Bosne i Hercegovine, uzimaju se u obzir:

a) složenost predmeta u činjeničnom i pravnom smislu,

b) aktivnost suda, tužilaštva, organa uprave i drugih nosilaca javnih ovlaštenja,

c) ponašanje podnosioca pravnog sredstva,

d) značaj predmeta za podnosioca pravnog sredstva i

e) zakonske odredbe o hitnosti postupka.

## Član 7

(Hitnost u postupanju)

Postupci u kojima se štiti pravo na suđenje u razumnom roku su hitni i imaju prvenstvo u odlučivanju.

DIO DRUGI - ZAHTJEV ZA ZAŠTITU PRAVA NA SUĐENJE U RAZUMNOM ROKU

Član 8  
(Pokretanje postupka)

(1) Postupak u kome se štiti pravo na suđenje u razumnom roku počinje teći podnošenjem zahtjeva sudu pred kojim se vodi postupak iz člana 1 ovog zakona.

(2) Zahtjev se može podnijeti prije okončanja postupka iz člana 1 ovog zakona.

Član 9  
(Sadržaj zahtjeva)

Zahtjev sadrži:

- a) lično ili poslovno ime stranke i njeno prebivalište, boravište ili sjedište,
- b) lično ili poslovno ime zastupnika ili punomoćnika stranke i njegovo prebivalište, boravište ili sjedište,
- c) naziv suda pred kojim se vodi postupak,
- d) poslovni broj sudskog predmeta,
- e) vrijeme trajanja postupka,
- f) podatke o predmetu suđenja koji ukazuju na to da sud nepotrebno kasni s odlučivanjem i
- g) potpis podnosioca zahtjeva.

Član 10  
(Nadležnost za odlučivanje)

(1) O zahtjevu odlučuje predsjednik suda.

(2) Predsjednik suda godišnjim rasporedom poslova može odrediti jednog ili više sudija koji mogu voditi postupak i odlučivati o zahtjevu.

(3) Usmena rasprava se ne održava.

(4) Rješenje o zahtjevu ne smije da utiče na činjenična i pravna pitanja koja su predmet suđenja.

(5) Rješenje kojim se usvaja ili odbija zahtjev mora biti obrazloženo.

(6) Rješenje o zahtjevu se mora donijeti u roku od šezdeset (60) dana od dana prijema zahtjeva.

Član 11  
(Odbacivanje zahtjeva)

(1) Zahtjev se odbacuje ako odsustvo nekog elementa zahtjeva iz člana 9 ovog Zakona onemogućava da se po njemu postupa (neuredan zahtjev) ili ako je zahtjev podnijela neovlaštena osoba.

(2) Zahtjev se odbacuje i ako, s obzirom na trajanje postupka koje je navedeno u zahtjevu, očigledno nije povrijeđeno pravo na suđenje u razumnom roku.

(3) Protiv rješenja o odbacivanju zahtjeva nije dozvoljena žalba.

Član 12  
(Prikupljanje informacija)

(1) Predsjednik suda će u roku od osam dana od dana prijema zahtjeva zatražiti od sudije ili predsjednika vijeća (u daljnjem tekstu: sudija), koji postupa u predmetu, izvještaj o dužini trajanja postupka, razlozima zbog kojih postupak nije okončan i mišljenje o roku u kojem se predmet može riješiti, a može izvršiti i uvid u spis predmeta.

(2) Sudija koji postupa u predmetu dužan je dostaviti izvještaj iz stava 1 ovog člana odmah, a najkasnije u roku od petnaest (15) dana.

Član 13  
(Odlučivanje o zahtjevu)

(1) Predsjednik suda proučava izvještaj, a po potrebi i spise predmeta i primjenom mjerila za ocjenu trajanja suđenja u razumnom roku iz člana 6 ovog zakona, rješenjem zahtjev odbija ili usvaja.

(2) Ako predsjednik suda utvrdi da je zahtjev osnovan, rješenjem određuje rok od najduže šest mjeseci, osim ako okolnosti slučaja ne nalažu određivanje dužeg roka, u kojem je sudija dužan preduzeti mjere u cilju rješavanja predmeta.

(3) Rješenje iz stava 2 ovog člana predsjednik suda dostavlja stranci i postupajućem sudiji.

(4) Protiv rješenja iz stava 2 ovog člana žalba nije dozvoljena.

(5) Ako predsjednik suda utvrdi da zahtjev nije osnovan, odbija ga rješenjem.

Član 14  
(Žalba)

(1) Protiv rješenja o odbijanju zahtjeva, stranka ima pravo na žalbu u roku od osam dana od dana prijema rješenja.

(2) Stranka ima pravo na žalbu i ako predsjednik suda o njenom zahtjevu ne odluči u roku od šezdeset (60) dana od dana prijema zahtjeva.

Član 15  
(Nadležnost za odlučivanje o žalbi)

(1) Žalba se podnosi predsjedniku suda koji je odlučivao o zahtjevu.

(2) Predsjednik suda iz stava 1 ovog člana žalbu s relevantnim podacima iz spisa predmeta odmah dostavlja predsjedniku neposredno višeg suda.

(3) Ako je o zahtjevu odlučivao predsjednik Apelacionog suda Brčko distrikta Bosne i Hercegovine, postupak po žalbi vodi i odlučuje vijeće Apelacionog suda Brčko distrikta Bosne i Hercegovine sastavljeno od troje sudija.

(4) Žalba se ne dostavlja na odgovor.

(5) Predsjednik neposredno višeg suda iz stava 2 ovog člana, odnosno vijeće iz stava 3 ovog člana dužni su odlučiti o žalbi u roku od trideset (30) dana od dana prijema žalbe.

(6) Predsjednik neposredno višeg suda, odnosno vijeće iz stava 3 ovog člana može žalbu odbiti kao neosnovanu i potvrditi prvostepeno rješenje ili preinačiti rješenje.

#### Član 16 (Pravo na novi zahtjev)

(1) Stranka čiji je zahtjev odbačen zbog neurednosti zahtjeva može podnijeti novi zahtjev.

(2) Stranka čiji je zahtjev odbijen, a koja nije podnijela žalbu, može podnijeti novi zahtjev istekom roka od šest mjeseci, računajući od dana prijema rješenja o odbijanju zahtjeva.

(3) Stranka čija je žalba odbijena, može podnijeti novi zahtjev istekom roka od šest mjeseci od dana prijema pravosnažnog rješenja.

### DIO TREĆI - ZAHTJEV ZA ISPLATU NOVČANE NAKNADE ZBOG POVREDE PRAVA NA SUĐENJE U RAZUMNOM ROKU

#### Član 17 (Sticanje prava)

(1) Ako sud ne preduzme mjere u cilju rješavanja predmeta u roku određenom u rješenju iz člana 13 ovog zakona, stranka može podnijeti zahtjev za isplatu novčane naknade zbog povrede prava na suđenje u razumnom roku.

(2) Zahtjev iz stava 1 ovog člana se podnosi predsjedniku suda u roku od šest mjeseci, po isteku roka iz člana 13 ovog zakona.

(3) Predsjednik suda rješenje donosi u roku od 30 dana od dana podnošenja zahtjeva iz stava 1 ovog člana.

(4) Protiv rješenja iz stava 3 ovog člana stranka može u roku od osam dana od dana prijema rješenja podnijeti žalbu predsjedniku neposredno višeg suda.

(5) Ako je rješenje iz stava 2 ovog člana donio predsjednik Apelacionog suda Brčko distrikta Bosne i Hercegovine rješenje po žalbi donosi vijeće Apelacionog suda Brčko distrikta Bosne i Hercegovine sastavljeno od troje sudija.

(6) Rješenje se dostavlja stranci, predsjedniku suda pred kojim je došlo do povrede prava na suđenje u razumnom roku i nadležnom organu za izvršenje rješenja.

#### Član 18 (Visina naknade)

(1) Podnosiocu zahtjeva novčana naknada priznaje se u visini od 300,00 KM do 3.000,00 KM.

(2) U slučaju da više lica podnese zahtjev u jednom predmetu, novčana naknada ne može preći iznos od 10.000,00 KM.

(3) Pri određivanju visine novčane naknade, sud primjenjuje mjerila za ocjenu trajanja suđenja u razumnom roku iz člana 6 ovog zakona.

#### Član 19 (Isplata i obezbjeđenje sredstava)

(1) Novčana naknada se isplaćuje iz budžeta Brčko distrikta Bosne i Hercegovine.

(2) Rješenje iz člana 17 stava 3 ovog zakona ima snagu izvršne isprave.

#### DIO ČETVRTI - PRELAZNE I ZAVRŠNE ODREDBE

#### Član 20 (Primjena zakona)

Ovaj zakon se primjenjuje na sve započete postupke pred sudom, a koji do stupanja na snagu ovog zakona nisu pravosnažno okončani.

#### Član 21 (Stupanje na snagu)

Ovaj zakon stupa na snagu osmog dana od dana objavljivanja u Službenom glasniku Brčko distrikta Bosne i Hercegovine.

Broj: 01-02-1018/21  
Brčko, 24. 2. 2021. godine

**PREDSJEDNIK  
SKUPŠTINE BRČKO DISTRIKTA BiH**

Mr. sci. Siniša Milić